

Siunnersuut uunga: Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. xx.xx 2016.

(Ilaqutariinnermut, Naligiissitaanermut Isumaginninnermullu Naalakkersuisumit saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Medlem af Inatsisartut Tillie Martinussen, Demokraatit, siulittaasoq

Medlem af Inatsisartut Agathe Fontain, Inuit Ataqtigiit, siulittaasup tullia

Medlem af Inatsisartut Jess Svane, Siumut

Medlem af Inatsisartut Laura Tàunâjik, Siumut

Medlem af Inatsisartut Ineqi Kielsen, Siumut

Medlem af Inatsisartut Ane Hansen, Inuit Ataqtigiit

Medlem af Inatsisartut Mimi Karlsen, Inuit Ataqtigiit

UPA 2016-imi ulloq 26. april 2016 siullermeerinerup kingorna siunnersuut ataatsimiititaliamit sukumiinerusumik misissorneqarpoq.

Siunnersuutip imarisaa siunertaalu

Isumaginnittoqarsiup aqunneqarnera aaqqissuussaanelugu pillugit inatsisissatut siunnersuut Inatsisartut peqqussutaannut allannguutissatut siunnersuutaavoq. Siunnersuutip qulequtaata nassuiaatitaraa - *Isumaginninnermi malittarisassanik kommunit aqutsinerannik atorunnaarsitsineq*, allannguutissatut siunnersuut ulloq 1. juli 2016 atuutilersussatut siunnersuutigineqartumi §§ 7a-miit 7g-mut aalajangersagaqarpoq.

Siunnersuummi isumaginninnermi malittarisassanik tamanik ilaqartumi matumani ilanngullugu meeqqanut inuusuttunullu ikiorsiisarneq pillugu Inatsisartut peqqussutaat kommunit isumaginninnikkut malittarisassaannik Naalakkersuisut atorunnaarsitsisinaanerannik inatsisitigut tunngavissinneqarnissaannik siunertaqartoq. Isumaginninnermut malittarisassat naapertorlugit kommuni pisussaaffimminik

innuttaasulluunniit pisinnaatitaaffiinik annertuumik sumiginnasoqaraluarpuunniit. Kommunit isumaginninikkut malittarisassanik isumaginninnerup tamakkiisumik ilaannakortumilluunniit piginnaatitaalernissaat siunnersuummi siunertarineqarpoq.

Siunnersuutip Inatsisartuni siullermeerneqarnera

Siunnersuut ulloq 26. april 2016-imi Inatsisartuni siullermeerneqarpoq. Saqqummiussissutip 14. april 2016-imeersup saniatigut Siumut, Inuit Ataqatigiit, Demokraatit, Atassut, Partii Naleraq attaviitsorlu Naaja H. Nathanielsen oqaaseqaateqarput.

Kommunerujussuannortitsinermi aammalu qitiusumik aqutsinerup annertusineqarneratigut innuttaasut illoqarfinnilu oqartussat akornanni attaveqatiggiinerup sanngiillisinneqarsimaneranik kinguneqartoq, taamaalillunilu innuttaasut atugaat kommunillu sullissinerat ajorseriarsimasoq, sumiiffippassuarni mikinerusuni neriuutaarunnermik kinguneqartartoq **Siumup** oqaatigaa. Siunnersuut ataatsimut isigalugu Siumup tapersersorpaa, siunnersuut innuttaasut iluaqutaasumik atukkatigut pisinnaatitaaffiinik qulakkeerisussaammat.

Inatsisissatut siunnersuutip matuma pilernera meeqqat inuusuttullu pisinnaantitaaffiitut tunngatillugu kommunit sumiginnaasimanerannik aallaaveqartoq **Inuit Ataqatigiit** oqaatigaa. Taamaattoq meeqqanut inuusuttunullu malittarisassat kommunit aqutsinikkut sumiginnaasimanerannik imaluunniit aqutsisinnaannginnerannik ajornartorsiummut siunnersuutip matuma ilumut aaqqiissutaasinnaanera Inuit Ataqatigiit ernumanartoqartippaat. Aammattaaq siunnersuutip akisussaaffinnut allanut Namminesorlutik Oqartussanit kommuninut tunniunneqarsimasunut tuniluussinnaanera Inuit Ataqatigiit ernumassutigaat.

Inuiaqatigiinni meeqqat, inuusuttut, mianersuuttariaqartut sanngiitsullu tapersersorneqarnissamik isumassorneqarnissamillu pisinnaatitaaffiinik tapersersorneqarnissaat aalajangiisuusoq **Demokraatit** oqaatigaa. Kikkut pisuunersut akisussaansullu sammineqarnissaa Demokraatit kissaatiginngilaat, ajornartorsiutilli aaqqinneqarnissaannut suleqatigiittoqartariaqarpoq.

Siunnersuut Tunngaviusumik inatsimmi § 82-imut kommunillu nammineerlutik aalajangiisnaatitaanerannut pisinaatitaaffiinik sukulluunniit naapertuutinnigitsut Demokraatinit isumaqarfigineqapoq. Meeqqat, inuusuttut, mianersuuttariaqartut sanngiitsullu sumiginarneqarsimasut siunnersuummi taamaallaat iluaquserniarneqartut Demokraatit isumaqarput. Siunnersuut tamakkiisumik Demokraatit taperserpaat, taamaaliornikkut immikkut pisoqartillugu pisariaqarfiaatigut Naalakkersuisut akulerunnissaminut pisinnaatitaaffilerneqarsinnaaqullugit.

Matumani siunnersuutigineqartup kommunit nammineersinnaaneranut akerliussasoq tunngaviatigut **Atassutip** ernumagisimagaluarpaat, Naalakkersuisulli taamannnginnerarlugu siunnersuuteqarmata tatigalugit. Siunnersuut Atassutip tapersersorpaa, inuiaqatigiittut

meerartatsinnut inuusuttortatsinnullu illersuinissamik pisussaaffeqarnitsinnut qulakkeerineqataasussaammat.

Kommunit nammineq aqutsisinnaanerata ataqqineqartariaqartoq, partiilu siunnersuummut taama tunngavilimmut akerliusoq **Partii Naleraq** erseqqissaavoq. Meeqqanik sumiginnaasarneq sukkulluunniit akuerisinnaanagu Partii Naleqqap oqaatigaa. Sumiginnaasarnermi ajornartorsiutaasoq Namminersorlutik Oqartussat kommunillu kisimiillutik aaqqissinnaangilaat. Sumiginnaasarnerup ajornartorsiutaanerata qaangerniarnissaanut nunatsinni innuttaasut matuersaammik tigummiaqarput taamaaliortoqanngippat aaqqinneqarsinnaangimmat. Suliassa qarfimmi Naaminersorlutik Oqartussat kommunillu suleqatigiinnerat nukittorsarneqarpat oqartussanit suliniutit aallartinneqarsinnaasut pitsaanersarigaat Partii Naleraq isumaqarpoq. Taamaattoq kommunit akisussaaffitsik kivissinnaangippassuk akulerunnissamat periarfissaqartariaqartoq Partii Naleqqap akuersaarpa. Akulerunnerli kommunit nammineq aalajangiisinnaanerannut akerliussanngilaq.

Siunnersuutigineqartup tunuliaqutaa nutaajunngitsoq **Attaviitsoq, Naaja H. Nathanielsen** oqarpoq. Meeqqanik inuusuttunillu sumiginnaasarneq sivisuumik atuussimavoq sulilu ullumikkut ajornartorsiutaalluni. Taama pisoqarneranut inuiaqatigiit akisussaqaataapput. Siunnersuummi matumani sumiginnakkanik ajornartorsiuteqarnerup aaqqinneqarnissaanut qulakkeerineqarnissaaningarnit iliuseqarusussutsimik takutitsinerinnaasoq attaviitsup, Naaja H. Nathanielsenip annertuumik ernumassutigaa. Nunatta isumaginninnikkut ajornartorsiutai annikinnerulernaviangillat akisussaaffiup oqartussanit allanit tiguneqarnerinnaatigut. Nukissanik pisariaqartitsineq suliassallu kommunini sullissisut sularisartagaat sammineqarnerusariaqartut attaviitsoq, Naaja H. Nathanielsen isumaqarpoq. Isumagininnermi suliassa qarfinnut nukissat annertusarneqartariaqartut attaviitsoq, Naaja H. Nathanielsenip erseqqissaatigaa. Sullissisut saaffiginninnissamullu periarfissat amerlanerusariaqarput.

Tamanna tunngavigalugu siunnersuut Ilaqutarinnermut Peqqissutsimullu Ataatsimiititaliamut sukumiinerusumik naliligassanngorlugu innersuunneqarpoq.

Tusarniaanermi akissuteqaatit

Tusarniaanermi akissutigineqartut inatsisissatut siunnersuummut ilanngunneqarsimasut ataatsimiititaliap maluginiarpa tamannalu Siulittaasoqarfiup ilusiliinissamut piumasaqaatigisaanut naapertuuppoq. Aammattaaq siunnersuummut ilanngussaq 1-itut tusarniaanermi akissuteqaatit ilanngunneqarput.

Inatsisissatut siunnersuut ulloq 15. januar 2016-imiit ulloq 19. februar 2016-imut tusarniaassutigineqarsimasoq ataatsimiititaliap maluginiarpa.

Inatsisissatut siunnersuutip qimerloorneqareerneratigut Ilaqutariinnermut, Naligiissitaanermut Isumaginninnermullu Naalackersuisoqarfiup Naalagaaffiup eqqartuussisorisua/Eqqartuussisorisoqarfik Poul Schmith ulloq 10. Marts 2016-imi allakkiamik suliaqaqqullugu qinnuigisimagaa immikkut ataatsimiititaliamit maluginiarneqarpoq. Tamanna pingaartumik kommunit nammineersinnaatitaanerannut, tunngaviusumik inatsimmi § 82-imi aalajangersarneqarsimasumut inatsisip allanngortinneqarnissaanik eqqarsaatigineqartumut qanoq unioqqutitsitigissanersoq nalilerneqarnissaa siunertaralugu.

Siunnersuummut Naalagaaffiup Eqqartuussisorisua ima inerniliivoq:

- **Pisinnaatitaaffiup pingaarnertut agguanneqarnissaanut tunngatillugu malunnaatilimmik naliliisarneq inatsisiliortunut tunniunneqarpoq. Namminersorlutik Oqartussat kalaallilu nunaanni kommunit akornanni pissutsit aamma atuupput.**
- **Suliassaqarfiit aalajangersimasut komuninit aqunneqarnissaasa qulakkeerneqarnissaat Tunngaviusumik Inatsimmi § 82 siunertaasoq isumaqassalluni tunngavissaqanngilaq.**
- **Pisinnaatitaaffik kommuninut nuunneqarsimasup Naalagaaffimmit/Namminersorlutik Oqartussanit tiguneqarnissaa Tunngaviusumik Inatsimmi § 82 naapertorlugu maannamut akornutissaqanngilaq.**
- **Tunngaviusumik Inatsimmi § 82-imi allassimasoq naapertorlugu Naalagaaffiup nakkutilliinera innuttaasut inatsisitigut isumannaatsumik qularnaarunneqarput.**
- **Suliassaqarfinnut kommuninut tunniunneqareersimagaluartunut Naalagaaffimmi oqartussaasut/Namminersorlutik Oqartussat aalajangiinissaannut pisinnaatitsineq tunngaviusumik inatsimmut akerliunngilaq. Naak kommunimi aqutsineq unioqqutitsinerunngikkaluartoq atuuppoq, innuttaasulli inatsisitigut isumannaatsuunissaat eqqarsaatigalugu Naalagaaffik /Namminersorlutik Oqartussat akulerussinnaatitaanerat annertuneruvoq.**
- **eqqartuussisunut tunniussineq kingumoortumik atuutilersinneqarsinnaannginnermik inatsisitigut aalalangersaanermi inatsisiliortut periarfissaqarput. Taamaattoq aalajangersakkat isumaginnittoqarfiup aqunneqarnera aaqqissugaaneralu pillugit Inatsisartut peqqussutaata allanngortinneqarnissaanik eqqarsaatigineqartoq tamanna eqqarsaatigineqarsimagunannngilaq.**

**● Nammissorsorlutik Oqartussat aalajangiinerannik kommunit
naammagittaalliuuteqarsinnaalernissaat takornartaassaaq, malittarisassani
Danmarkimi atuuttuni malittarisassanilu Kalaallit Nunaanni atuuttuni.**

Inatsisissatut siunnersuummut oqaaseqaatit itisiliiffigineqarnissaasa periarfissinneqarnissaa siunertaralugu ulloq 4. maj 2016 KANUKOKA-p aallartitaanik ataatsimiititaliaq ataatsimeeqateqarpoq aammalu ulloq 10. maj 2016-imi Kommuneqarfik Sermersuup sinniissaanik ataatsimiititaliaq ataatsimeeqateqarluni. Oqaatigineqassaaq siunnersuummut tusarniaanermi akissuteqaatinik imartuunik KANUKOKA aamma Kommuneqarfik Sermersooq tunniussaqaarmata taakkulu immikkoortui pingaernerit tusarniaanermi allakkiani suliarineqareerlutik.

Aammattaq ulloq 17. maj 2016 siunnersuut pillugu Meeqqat Oqaaseqartartuanik ataatsimiititaliaq ataatsimeeqateqarpoq. Siunnersuummut Meeqqat Oqaaseqartartuat aamma tusarniaanermut akissuteqaammik tunniussaqaarpoq.

Ataatsimeeqateqarnermi oqariartuutit pingaernerit makku isumaliutissiissummi erseqqissaatigineqassapput:

KANUKOKA

Siunnersuut tapersorsorsinnaanagu KANUKOKA-p oqaatigaa. KANUKOKA-p tusarniaanermi akissuteqaataa tamakkiisoq siunnersuummullu tusarniaanermi allagaqaataa innersuussutigineqarput.

● Naalackersuisut annertunerusumik nakkutillinissaat ataatsimut isigalugu KANOKOKA-mit kissaatigineqarpoq, taamaalilluni naapertuutinngitsut sukkanerusumik qulaajarneqartariaqarmata tamaaliornikkut kommunit pineqartunut malinnaasinnaaniassammata. Taamatut siunnersuuteqarnermut taarsiullugu nakkutilliinerusooqartariaqarpoq. Nakkutilliinerit amerlanerusut kommuninullu siunnersuinerit amerlanerusut. Ataatsimut isigalu siunnersuuteqarnermit pitsaanerussaaq kommunit nammineersinnaanerannut killilersuinissamik siunnersuuteqarnermit suleqatigiinneq annertunerusoq anguneqarsinnaappat.

● Naalackersuisut kommuninut sakkussanik amerlanerusunik tunniussaqaarnissaat tapersersuinerunissaallu siunnersuummut matumunnga taarsiukkaanni pitsaanersooq KANUKOKA-mit isumaqarfigineqarpoq. Sakkussat kommuninut naleqqusakkat ilitersuinerninngarnit pitsaanerupput, amerlasuutigut ilinniarsimannngitsunik isumaginninnikkut siunnersortitut sulisoqarfiusuni, taamaalillutillu ilitersuutinik piusunik sulisunit ilinniarluarsimasunit, akerlianillu sullissinissamut innuttaasunillu sullissinissamut misilitagaqakkajunngitsunit suliarineqarsimasunik atuinissaminnut nalorsartunut atorneqartarlutik. Sakkut aamma malittarisassaapput ersarinnerusut aqunnissaallu oqinnerusarluni pisariinnerusarlunilu.

- KANUKOKA naapertorlugu suliassa qarfinni kommuninut tunniunneqareersimasunut Naalakkersuisut sullissisussaangillat. Tamanna tungaviusumik kukkulluinnarneruvoq. Naalakkersuisut kommunini sullissinissaminni piginnaasanik pisariaqartunik suminggaanniit pissarsiniaramik? Siunnersuinernik, pitsaanerusunik ilitersuusiornernik malittarisassanillu aqukkuminarnerusunik suliqaqnissamik Naalakkersuisut aallussinerusariaqarput. Sullissisut suliassa amerlanerpaaffissalernerisigut ataatsimullu isigalugu sullissisunut sulinermit atugassarititaasut aningaasarsiatigut pitsangorsaanerit, ilinniartitaanerit ilinniaqqinnerillu (piginnaasanik qaffassaaneq) isumaginninnermut sullissinissamut pitsangorsaataapput pitsaanerpaat.
- KAKUKOKA-p siunnersuut inatsilerituut isaannik isilerluni sukumiisumik misissorlugu aallartippaa, taamaalilluni siunnersuutigineqartoq kommunit nammineersinnaatitaanerannut akerliunersoq sukumiinerusumik ersarissisikumallugu. Taamaattoq pissutsit inatsilerituunit avataaneersunit misissorneqarnissaa pineqanngilaq, paasiniaallunili qulaajaanersalluni.
- Ilanngullugu KANOKOKA-p ernumassutigineqarpoq kommunini sulisorpassuit atorfeqarnertik apeqqusersulersinnaammassuk, Naalakkersuisut kommunini sulisut ilitersornissaannut pisinnaatitaaffeqalernissaannik siunnersuut periarfissiimmat.
- Kommunit kattussuunneqarnerat isumaginninnikkut suliassa qarfimut ajornartorsiutinik pilersitsisimammata KANUKOKA-p uppersarppaa. Illoqarfinni nunaqarfinnili kommunit mikinerugallarnerisa nalaani sulianut piginnaasat qanimullu oqartussaaqataaneq annaaneqarsimapput, aaqquissuussinerit nutaat kommunerujussuillu aaqquissugaanerit namminermit sulianik allanngortitsinerit kingunerisaannik innuttaasut amerlasuut piginnaasallit noorarsimammata ilinniakkatigullu piginnaasatik nassarlugit.
- Nipangiussisussaataitaanermut malittarisassat suli ajornartorsiutaasut KANOKOKA-mit oqaatigineqarpoq immaqa tamatiguunngikkaluartumik malittarisassanik kikkut tamarmik eqqortumik aqutsisinnaannginnerat pissutigalugu pituttuivallaarluni imaluunniit suliakimorlugit ilisimasanik avitseqatigiinnissamut ajornakusoortitsisoqarsinaammata, tamatumalu kingunerisaannik innuttaasunut pitsaanerpaamik sullissinissamut ajornartorsiutinngortarluni. Nipangiussisussaataitaaneq pillugu malittarisassat pitsaanerusut imaluunniit ilitersuutit paasiuminartut pisariaqartinneqarput.

Kommuneqarfik Sermersooq

- Innuttaasut isumaginninnikkut pisinnaatitaaffiisa kommunillu pisussaaffiitut atatillugu inatsisitigut qulakkeerunneqarnissaat pingaaruteqartoq kommuni isumaqartoq kommunip ataatsimiititaliamik ataatsimeeqateqarnermini aallarniutigalugu oqaatigaa. Kommunimi innuttaasut atugarliortut tapersorneqarnissaat pingaaruteqartorujussusoq kommuni isumaqarpoq. Kommunimi meeqqat inuusuttullu toqqissisimasumik peroriartornissaasa

qulakkeerneqarnissaa pingaaruteqartoq kommunip oqaatigaa, inatsisissatulli siunnersuutigineqartoq taama iliornissamut periafissaanngilaq.

- Siunnersuummut tunngatillugu periuserineqartut tunngavilersuutinullu tunuaniittunut kommuni akerliuvoq. Kommunit ingerlanerliortut qalliinnarlugit pitsaasunik periusissiorqarsinnaanngilaq. Siunnersuutigineqartumi periusissanik eqqarsaatersuuteqartoqarnera tunngaviusumik ajornartorsiutaavoq. Siunnersuut aaqqissuussaannermi kommuninut akulerunneruvoq.

- Sullissivinni isumaginninnikkut siunnersortit amerlassusaasa tunngaviusumik ajornartorsiutigineqarneranut imaluunniit isumaginninnermut siunnersortip ataatsip suliassaasa amerlassusaanut inatsisissatut siunnersuut aaqqiissutaanaviangitsoq kommunip oqaatigaa. Siunnersuut soriarsinnaannginnermi uiverluni aaqqiiniarnertut isumaqarfigineqartariaqarpoq.

- Atorunnaarallartitsinerup marloqiusamik sammiveqalersitsinermik marloqiusamillu aqutsilerneramik ajornartorsiutinik pilersitsissasoq kommunip tungaaniit oqaatigineqarpoq. Piginnaatitaanermut attavigineqartartussanullu ajornartorsiutinik pilersitsissaaq – Matumani atorunnaarallartitsinerup nalaani kommunit ataasiakkaat sulisui kikkunnut attaveqarnissaannut apeqqummut tunngatillugu.

- Atorunnaarallartitsinerup nalaani ikiorsiiniarneq eqqarsaatigalugu ingasattajaarisooqarsinnaanera kommunimit erseqqissaatigineqarpoq, aningaasatigut toqqaannartumik akisussaafweqanngikaanni ikiorsiiniarnerit akisunerusinnaapput annertunerusumillu akuleruttoqalersinnaalluni (aningaasartuutissat killilersorneqarnissaannut piumassuseqannginneq). Suliat ataasiakkaat suliarineqarnerat sulianit ataatsimoortunit avissaartinneqarnerannik kommunillu isumaginninnikkut sullissinerisa ataatsimut isigineqarnerannut immikkoortitsinermik kinguneqassaaq. Isumaginninnermik sulineq oiffinni pissutsinut nukissanullu attuumassuteqarluinnarpoq.

Atorunnaarallarsitsinermi suliniutinut periutsinullu suliassanik aaqqiiniarnermut taarsiullugit suliat ataasiakkaat annertuallaamik nakkutigineqarnerannik kinguneqarsinnaavoq, suliallu ataasiakkaat illuatungaannarsiortumik sammiveqalersinnaapput aqunneqalerlutillu.

- Namminersorlutik oqartussat tigusinerat pissutigalugu aaqqiissutissat pitsaanerulernissaannut qulakkeerisoqarnaviangitsoq kommuni erseqqissaavoq. Akerlianilli atorunnaarallartitsinerup nalaani kommunit sulisunik pikkorissunik pisortanillu annaasaqariaannaapput, atorunnaarallartitsinermi kommuninut sulisuinullu tatiginninnginnermik takutitsisuunera pissutaalluni.

- Sulisunik ilinniarsimasunik piukkunnartunik sulisussarsiornermi kommunit Namminersorlutillu Oqartussat ataatsimoorlutik unammilligassaqartut kommunit erseqqissaatigaa.
- kommunit nammineersinnaanerisa kommunillu piunnarnissaannut sanngiillisinneqarnissaannullu siunnersuut manna alloriarfiusinnaasoq siulleq kommunit miannersoqqussutigaa. Inatsisissatut siunnersuut kommunit nammineersinnaanerannut akulerunnerusoq ernumanartorujussuaq ajornartorsiutaasorlu kommunit isumaqarpoq. Taamatut akulerunneq atugarissaarnernut tunngasuni assersuutigalugu meeqqat atuarfiannut pitsaanngitsumik tuniluussinnaanera kommunit ernumassutigaa.
- kommunit suliassanik aaqiiniarnerini qaffassaanissaq Namminersorlutik Oqartussat kommunillu akornanni naligiilluni kinguneqarluartumillu oqaloqatigiinnikkut aqqissuussamillu akulerunnani ingerlanneqarnissaa pingaaruteqartorujussuusoq naggataatigut kommunit oqaatigaa.

Meeqqat Oqaaseqartartuat

Ulloq 17. maj 2016-imi ataatsimiititaliamik ataatsimeeqateqarnermi siunnersuutigineqartoq tapersorsorlugi Meeqqat Oqaaseqartartuata oqaatigaa. Siunnersuummut tapersiineq siunneruummut tusarniaanermi akissuteqaammi Meeqqat Oqaaseqartartuata aamma oqaatigeriigaa.

- Siunnersuutigineqartumut tunuliaqutaasoq pillugu Meeqqat Oqaaseqartartuata uppersarsarpaa meeqqat inuusuttullu pillugit kommunini suliani amerlasuuni meeqqanik inuusuttunillu ikiorneqarneq ajortunik ilisimasaqarluni. Ajuusaarnaraluartumik nuna tamakkerlugi tamanna pisarpoq, pingaartumillu avannaani, tunumi kujataanilu meeqqanik sumiginakkanik ikiortissaaleqillutillu tapersorsortissaaleqisunik amerlasuunik Meeqqat Oqaaseqartartuat ilisimasaqarpoq.
- Siunnersuutigineqartoq Meeqqat Oqaaseqartartuata tapersorsorpaa, tassa meeqqat illersorneqarnissaminnut pisinnaatitaaffeqarnerisa kommuninit qulakkeerneqarsimatinnagu marloriaammik sumiginnaanissaagaluumut illuatungiliuttuummat. Kommunit meeqqanut inuusuttunullu ikiorsiisarneq pillugu malittarisassani meeqqanut inuusuttunullu akisussaaffilerneqarnerisa pisussaaffilerneqarnerisalu saniatigut nunarput Meeqqat pillugit Isumaqatigiissummut pisussaaffigalugu ilanngunnikuvoq.
- Kommunit sulisunik nukissanillu amigaateqarpata taava allat suliamik tiguisariaqarput meeqqallu illersugaanerat qulakkeerlugi pisinnaatitaaffiilu eqquutsillugit. Meeqqanut suliassat kiap isumagissanerai Meeqqat Oqaaseqartartuata isummerfigerusunngilaa, tamannali Meeqqat pillugit Isumaqatigiissut suliassaqarfimmilu malittarisassat atuuttut naapertorlugit pinersaq isummerfigalugu.

- Meeqqat pillugit suliassarpassuarnut politiit malinnaasinnaanginnerat ilisimaqarfigalugu Meeqqat Oqaaseqartartuata oqaatigaa. Inissiinissamik suliat kommuninit malitseqartinneqarneq ajortut, taamaattumillu meeqqat angerlarsimaffimminnit peersinneqarsimasussaagaluit ukiuni arlalinni angerlarsimaffimmiiginnartartunik Meeqqat Oqaaseqartartuat erseqqissumik ilisimasaqarpoq.

- Meeqqat Oqaaseqartartuat naalackersuinikkut arlaannaannulluunniit attuumassuteqanngilaq, sulianili meeqqamut pitsaanerpaasusaaq qitiutillugu isummertarluni. Meeqqat pillugit Isumaqaatigiissut nunatsinnilu maleruagassat malillugit meeqqat pisinnaatitaaffii, illersorneqarnissaat, ineriartornissaat toqqissisimanissaasallu Meeqqat Oqaaseqartartuanit isummerfigineqartarput.

- Meeqqat Oqaaseqartartuata aamma oqaatigaa suliassarpassuit nalunaarutigineqarneq ajortut. Tamakku siunnersuineramik ingerlatsinerminni ilisimasaqarfigilertarpaat, taakkunani meeqqat pinerlineqarsimanerminnik, sumiginnarneqarsimanerminnik assigisaannillu pineqarsimanerminnik nalunaarutiginnissimangitsut ilaat oqaloqatigineqartarput. Taamaattumillu nunatsinni meeqqat inuusuttullu ornillugit suliniarfigineqartariaqarnerat, taamaaliornikkullu suliassat pissutsillu taakku paasiniarneqartarnissaat Naalackersuisut Inatsisartullu amma ilanngutissagaat Meeqqat Illersuisuata kaammattuutigaa.

Siunnersiuneq

Siunnersuummik sularinninnerminut atatillugu ataatsimiititaliap Ilaqutariinnermut, Naligiissitaanermut Isumaginninnermullu Naalackersuisoq ulloq 20. maj 2016-imi siunnersiorpaa. Naalackersuisup oqaasiisa allattorsimaffiata assilinera isumaliutissiisummut matumunnga **ilanngussaq 1**-itut ilanngunneqarpoq.

Kommuni pisussaaffimminik innuttaasulluunniit pisinnaatitaaffiinik annertuumik sumiginnaasimappat kommunip isumaginninnikkut maleruqaqusanik ingerlatsinerannik § 7a naapertorlugu Naalackersuisut atorunnaarallartitsinissamik aalajangersinnaanerisa immikkut itisiliivigineqarlunilu sumut killeqarneranik nassuiaanissaaq siunnersiunerminni ataatsimiititaliamit kissaatigineqarpoq. Atorunnaarallartitsinerup qanoq ingerlanneqarnissaanik eqqarsaatit annertunerusumik ilisimasaqarfigineqalernissaat aamma ataatsimiititaliamit kissaatigineqarpoq. Matumani piffissaaq kommuninilu sulisunut tunngasut eqqarsaatigalugit aammalu kommunimi/kommunini kommunip pisussaaffiitut innuttaasullu pisinnaatitaaffiitut aporaattoqannginnissaa siunertaralugu nukit atorineqartussatut eqqarsaatigineqartut eqqarsaatigalugit.

Kommunit isumaginninnikkut malittarisassanik isumaginninnerinut nakkutilliinerup nukittorsarneqarnissaa qanoq pisariaqartinneqarnerisooq aammalu kommunit pisussaaffiisa innuttaasullu pisinnaatitaaffiisa eqqortinneqarnissaanik qulakkeerinissaaq siunertaralugu

isumaginninnikkut suliassa qarfimmuq tunngatillugu Naalackersuisut kommunillu suleqatigiinnerisa nukittorsarneqarnissaanut periusissiamik anguniakkanillu qanoq annertutigisumik suliqartoqarnersoq pillugu naalackersuinikkut oqariartuutunik siunnersiuinermi ataatsimiititaliaq aamma pissarserusussimavoq. Tamatumani siunertarineqarluni kommunit pisussaaffiik innuttaasullu pisinnaatitaaffiik eqquutsitsinissap qulakkeerneqarnissaa.

Akissut ilanngussaq i-miittoq ataatsimiititaliamit innersuussutigineqarpoq.

Siunnersuummik ataatsimiititaliap sularinninnera nanginnera.

Inatsisissatut siunnersuut ilusimisut iluseqartoq inatsisitigut illersorneqarsinnaasoq Naalagaaffiup Eqqartuussisoriuata isumaqarfigigaa ataatsimiititaliap maluginiarppaa. Pisinnaatitaaneq maannamut kommuniniittoq Namminersorlutik Oqartussanit tiguneqarnissaa utertinneqarnissaaluunniit tunngaviusumik inatsimmi § 82-imi akornutissaqannginnerata saniatigut siunnersuut tunngaviusumik inatsimmi § 82-imut kommunit nammineersinnaanerannut akerliunngilaq.

Kommunit nammineersinnaanerat innuttaasut inatsisitigut isumannaatsuunissaannut akerliussanngilaq.

Isumaginninnermut tunngasuni kommunit sulisussa qarniarnikkut annertuumik ajornartorsiuteqartut ilaannilu sulinerminni akuerineqarsinnaanngitsunik atugaqartarnerat aammalu kommunini sullissisut amerlasuutigut ajornakusoortunik oqimaatsunik suliassarpassuaqartarnermikkut inunnit amerlasuunit nukittuunit ilinniakkatigullu piginnaasalinnit pisortallu neqeroorutaannik aamma sunniuteqarnissamik pisariaqartitisartut ataatsimiititaliap ilisimavaa.

Suliat amerlassusaannut tunngatillugu UPA 2015/38-imut siunnersuummut allannguutissatut siunnersuutip ataani allassimasoq Inatsisartut UPA 2015-imi akuerimmassuk ataatsimiititaliamit erseqqissaatigineqassaaq:

Naalackersuisunit peqquneqassapput Kommunini sulisut meeqqanik inuusuttunillu ajornartorsiuteqartunik tunngasunik oqaloqatigiinnissat siunertaralugit sulisut pineqartut qanoq assigiinngitsunik amerlatigisunik, kiisalu suliassiissutunik sulinerminnilu qanoq nammataqartiginersut, taamatullu suliassanut nukissanik naammaattunik peqartitsinersoq, kiisalu isumaginnittunut suliassat qanoq amerlassuseqarnissaat pillugu periarfissaqarnersoq, tamannalu pissusissamisoortuunersoq pillugit oqaloqateqarnissaq. Naalackersuisut misissuinerisa naliliinerisalu inernera nalunaarusiorninngorlugit Inatsisartunut agguanneqassapput kingusinnerpaamik UKA16-imi.

Nalunaarusiap kissaatigineqartup tigunissaa ataatsimiititaliamit qilanaarineqarpoq, ilanngullugulu arlalitsigut suliniuteqarnermikkut nalunaarusiaq Naalakkersuisunit malitseqartinneqqarnissaa naatsorsuutigalugu.

Isumaginninnermut tunngasup ilaa pillugu Namminersorlutik Oqartussat kommunillu suleqatigiinnissaannik annertuumik piumasaqarneq suli pingaartillugu atuutsinneqartoq ataatsimiititaliaq isumaqarpoq, taamaalilornikkut toqqaannartumik pinaveersaartitsinermilu suliniuteqarnikkut meeqqanik inuusuttunillu sumiginnaasoqartarunnaarniassammat. Suliassa qarfimmili aaqqiissuteqarniarnermi innuttut tamakkiisumik suleqataasinnaaneq apeqqutaalluinnarpoq.

Pissutsit pitsaanerusumut mumisinneqassappata isummertarnerup allanngortineqarnissaa pisariaqarpoq.

Inuiaqatigiinni annertuumik ataatsimullu isigalugu nunap ineriartorneranut sunniuteqartumik nunatsinni meeqqanik inuusuttunillu sumiginnaasarneq ima annertutigaaq inuiaqatigiinni ulorianartumik inissisimasoqalersimalluni imalu aarlerinartigaaluni ajornartorsiutit aaqinneqarnissaat siunertaralugu nukissanik pisariaqartinneqartunik pineqartumi pingaarnersiuisoqartariaqarluni.

Inuttaasut nukittuut innuttaasullu atugarissaartut inuiaqatigiit ineriartornerannut tamatigut tunngavissaapput.

Siunnersuut namminermi isumaginninnermut suliassanik ikilisitsinaviangitsoq imaluunniit isumaginninnermut suliassa qarfimmut nukissanik annertusisitsinaviangitsoq siunnersuutip siullermeerneqarnerani oqaatigineqartut ataatsimiititaliap isumaqatigai. Isuma kommuniniit aamma saqqummiunneqartoq.

Kommunit pisussaaffimminnik innuttaasullu pisinnaatitaaffiik immikkut annertuumik sumiginnaasoqartillugu Naalakkersuisut akulerunnissaminnut atortussaattut siunnersuut sakkussat isumaqarfigineqarpoq. Suliat Namminersorlutik Oqartussanit angerlarartinneqarnissaannik imaluunniit kommuninut tunniunneqarsimasunik utertitsinissamik siunnersuutigineqartumi siunnertarineqanngilaq. Siunnersuut suliama matumani isumaginninnermut inatsimmut tunngassuteqarpoq. Innuttaasut illersugaanissaat pingaarnersuq tamannalu pingaartilluinnarneqartariaqartoq ataatsimiititaliamit tunngaviusumik isumaqarfigineqarpoq.

Innuttaasut isumaginninnikkut pisinnaatitaaffii inatsisitigut aalajangersarneqarsimasut isumaqatigiissutinullu ilanngunneqarsimasut qulakkeerneqarnissaat ataatsimiititaliamut aalajangiisuulluinnarput.

Naalakersuisut sakkuutaasivimminni sunik sakkoqassanersut sakkoqassannginnersulluunniit naggataatigut Naalakkersuinikkut tapersersorneqassanersut isummerfigineqartussaavoq.

Kommuni akisussaaffimminik sumiginnaasimatillugu innuttaasut illersorneqarnissaannut siunnersuut qulakkeerineqataasinnaasutut ataatsimiititaliamit mattunneqarsinnaanngilaq. Aaqqiissuteqarnissaq siunertaralugu kommunit ataasiakkaat Naamisortullu Oqartussat akornanni kinguneqarluartumik suleqatigiinnerup kingunerissagaa meeqqaat inuusuttullu sumiginnaarneqarsimasut eqqarsaatigalugit ajornartorsiutit nassuerutigineqarlutillu qulaajaneqarnissaat suliat aallartippata paasinarsisapput.

Meeqqat inuusuttullu sumiginnaarneqartarnerat imaluunniit innuttaasut pisinnaatitaaffii aamma sumiginnaarneqartarnerat Inatsisartunit imaluunniit Naalakkersuisunit, naalakkersuinikkut innuttaasunilluunniit akuerineqarsinnaannginnerat oqariartuusigissallugu ataatsimiititaluamut pingaaruteqarpoq. Taamaaqataanik kommunit aamma oqariartuuteqarput.

Meeqqat inuusuttullu atugaannut aamma peroriartornerannut tunngasuni Inatsisartut Naalakkersuisullu akornanni suleqatigiinneq ajornartorsiutinik aaqqiiniarluni suleqatigiinnermik aallaaveqarpoq, ajornartorsiutillu saqqummiuneqarneranni allaffissornikkullu ingerlateqqinneqarneranni imaluunniit naalakkersuinikkut suliaqarnermi uninngaananani. Illuatungeriit takunngitsuusaagaqangillaat, nunatsinnilu innuttaasut sumiginnaarneqarnissaat soriarsinnaanngitsutullu uninngaannarnissaannik kissaateqaratik.

Kommunit nammineersinnaaneri ataatsimiititaliamit annertuumik ataqqineqarpoq, isumaginninnermilu suliaqat pitsaanerpaamik suliarineqassappata illoqarfiit innuttaasullu qanillillugit suliarineqartarnissaat suliarineqartariaqarnerilu pitsaanerpaammat apeqquserneqangiluinnaq, kisiani soorlu erseqqissaatigineqartoq innuttaasut pisinnaatitaaffii malinneqannginnerat, illoqarfinnilu oqartussanit nalunaaruteqartarnerit sulianillu malittarinninneq ajorneri aammalu malittarisassanut atuuttunut isumaqatigiissutinullu atuutilersinneqartunut tunngatillugu isumaginninnermut tunngasuni akisussaaffimmut atortuulersitsisimannginneq naalakkersuinikkut inuttulluunniit akuerineqarsinnaanngilaq.

Naak nunarput angisoorujussuugaluartoq aammalu pissutsit assigiinngiiaaraluartut sumiginnaasarneq annerusutut minnerusutulluunniit isigineqassanngilaq utoqqatsissutissaqaraniluunniit. Sumiginnaaneq sumiginnaaneruvoq akuerineqarsinnaanngitsoq akuerineqartussaannngitsorlu.

Nunami tamarmi meeqqanut inuusuttunullu sumiginnaasarnerup akuerineqanngilluinnaarnissaata aalajangiusimaaneqarnissaa ataatsimiititaliamit aalajangiusimaneqarpoq. Sullissisussaaleqinerit imaluunniit attaveqarniarnermi ajornartorsiuteqarnerit sumiginnaasarnerni utoqqatsissutigineqassanngillat.

Sumiginnaasarnerup nungutinneqarnissaanut piaartumik aaqqiissutissarsiortoqartariaqarpoq. Aaqqiissutissat nassaarineqarsinnaanngippata imaluunniit illoqarfinni isumagineqarsinnaanngippata taava kommunit akimorlugit suleqatigiinneq imaluunniit Naalakkersuisut ataanni inissisimasut immikkoortortaqarfiit suleqatigalugit ingerlanneqartariaqarpoq, taamaaliornikkut meeqqat inuusuttullu inatsisitigut illersugaanerat sukkulluunniit atuutsinneqarsinnaaqullugu.

- Siusissukkut iliuuseqartarnissap qulakkeerneqarnissaa siunertaralugu ataatsimiititaliap Naalakkersuisunut kaammattuutigissavaa nunatsinni meeqqanik inuusuttunillu sumiginnakkanik ullumikkornit annertunerusumik paasiniaasarnissap qulakkeerneqarnissaa, taamaaliornikkut meeqqanik inuusuttunillu sumiginnaanerup kinguneri pitsaanngitsut pinaveersimatinneqarsinnaaqullugit taamaalillunilu annikillisarneqarsinnaaqullugit.

Isummertarnermik allanngortitsisoqartariaqartoq ataatsimiititaliap erseqqissaatigissavaa. Nunatsinni sullissisut sulinerminni atugaat ajornakusoorlutillu oqimaakkaluaqisut, tunniutiinnarneq aaqqiissutissaanniglaq, soorluttaaq suliat piviusullu toqqortiinnarneqartarnerat aammalu sulianut atatillugu ajornartorsiutinut nipangiussiinnartarneq suliaqannginnerlu aaqqiissutissaanngitsut. Ajornartorsiutit saqqummiunneqartariaqarput aaqqiissutissarsiorneqarsinnaaniassammata. Isumaginninnermut tunngasuni inuit pineqarput, piffissaagallartillugulu ikiuinissamut suliniuteqarnissamik qularnaarinngikkutta ajornartorsiutit annertusiartuinnassapput inunnut inuiaqatigiinnullu ajorluinnartumik kinguneqarsinnaasumik. Suliassat illoqarfinni sularineqarsinnaanngippata imaluunniit ima annertugilersimappata illoqarfinni oqartussaasunit aaqqinneqarsinnaanatik pissutissaqanngitsumik utaqqisitsinertaqanngitsumik Naalakkersuisunik oqaloqateqarnermik aallartitsisoqartariaqarpoq taamaaliornikkut aaqqiisutissarsiornissamut pisussaaffiliisumik.

Ukiuni kingullerni Namminersorlutik Oqartussat nakkutilliisoqarfiat Ilaqutariinnermut, Naligiissitaanermut Isumaginninnermullu Naalakkersuisup ataanni inissisimasup, Meeqqat Oqaaseqartartuata imaluunniit allat nunatsiinni sumiiffinni assigiinngitsuni meeqqat inuusuttullu imaannanngilluinnartunik atugaqartut qulaajarsimavaat.

Kingulertigut assersuutissatut taaneqarsinnaapput: 2015-imi Meeqqat Oqaaseqartartuata Qaasuitsup Kommuniani illoqarfiit arlallit nunaqarfillu tikeraarpai, meeqqat inuusuttullu atugaat amerlasorpassuartigut tupannarput. Naak sulianut tunngatillugu arlalippasuariarluni nalunaaruteqartoqartaraluartoq oqartussat qisuariarneq ajorsimapput, susoqarnerlu ajorsimavoq iliuusissaaleqisoqartarsimalluniluunniit. Kommunimi pissutsit assinginik Namminersorlutik Oqartussat namminneq nakkutillisoqatigiivi 2014-imi kommunimut nakkutilliiartorlutik tikeraarneranni taamatuttaaq uppernarsaatissarsipput.

Tusagassiutit naapertorlugit Namminersorlutik Oqartussat nakkutilliiartortittagaat Kommuni Kujallermut nakkutilliiartornertik naammasseqqammerpaat, kommunimilu tassani aamma isumaginninnikkut suliassarpassuarnik naammattuuisimallutik, Ilaqutariinnermut

Peqqissutsimullu Ataatsimiititaliap sukumiinerusumik ilisimasaqarfigingisaanik, matumani malittarisassanik atuuttunik malinnittoqarsimangilaq.

Tasiilami immikkut suliniuteqarnissaq pillugu Namminersorlutik Oqartussat 2016-imi upernaakkut Kommuneqarfik Sermersuup suleqatiserivaa, isumaginninnikkut suliassat pingaartumillu meeqqanut inuusuttunullu tunngasut annertooujussuanngormata immikkut suliniuteqarnissamut pisariaqartitsilerluni. Paasissutissat naapertorlugit pineqartumi suleqatigiinneq tunngaveqarpoq kommuni ukiuni kingullerni Tasiilami isumaginninnermut tunngasunik misissuinernik suliqaarsimanera illoqarfimmilu annerusumik minnerusumilluunniit meeqqat affaat ilaqtaminni ingerlanerliortut isumaginninnikkut ilungersunartumik suliassartaqarnerat ersarimmat. Nunatta ilaani taama ajortigisumik inississimasoqarnera tupannartorujussuovoq, Namminersorlutik Oqartussat nakkutillisoqatigiivini aallartitsinneranit imaluunniit Meeqqat Illersuisuata qanoq ajortigisumik inississimasoqarneranik qulaajaanissaa utaqqingikkaluarlugu ajornartorsiutigineqartoq qaangerniarlugu kommunip suleqatissarsiorsimanera ataatsimiititaliamit nersualaarneqarpoq. Meeqqanik inuusuttunillu sumiginnaasarnerit suugaluartulluunniit iliuuseqarfigineqartariaqarput.

Pineqartumi pingaaruteqarpoq isummertarnerullu allangortinneqarnissaanut atatillugu suliqaannginnermit soriarsinnaannginnermilli soorlu naggataatigut aammalu suliap annertussusaa naapertorlugu akissussaatisoqarsinnaanera eqqarsaatiglaugu pissutsit kommunit namminneq qaqittarpatigit Naalakkersuisunillu oqaloqateqarnissamik suleqateqarnissamillu aallartitsisoqarsinnaagaluarluni. Akerlianik kommunini illoqarfinni unammilligassanik nukissanillu pisariaqartitsisoqarnerasoq paasiniassallugu Naalakkaersuisut soorunami aamma naalackersuinikkut soqutigineqartussaavoq, taamaalioinikkut ajornartorsiutit suliniutinillu pisariaqartinneqartunik qitiusumiit isumagineqarsinnaaniassammata. Naalakkersuisut kommunillu aamma innuttaasut akornanni suleqatigiillutik isumaginninnikkut paasiniaalluni, ammasumik naalackersuinikkullu kinguneqarluartumik suleqatigiittoqarnissaa pisariaqartorujussuovoq.

- Meeqqanut inuusuttunullu tunngasuni nakkutillineq ataatsimiititaliap arlaleriarluni sularisarpaa, kommunillu assigalugit suliassaqarfimmi nakkutilliinerup pitsaasumik annertuumillu nukittorsarneqarnissaa ataatsimiititaliamit kaammattutigineqarluni. Ilaatigut **UKA 2011/52-imut aamma UKA 2011/133-imut** aalajangiiffigisassatut siunnersuutit innersuussutigineqarput. Meeqqanut ikiorsiissutit pillugit inatsisissatut siunnersuutissami annertunerusumik nakkutilliinissamut siunnersuummik Naalakkersuisut saqqummiussaqaarnissaat ataatsimiititaliap naatsorsuutigaa. Meeqqat inusuttullu atugaasa nukittorsarneqarnissaasa qulakkeerneqarnissaa siunertarlugu kommunit nakkutilliinerat kommuninillu nakkutillineq pinngitsoorani toqqaannartumik pinaveersaartitsinermillu sulineq qaffatsinneqartussaavoq.

Sullissisut suliassaqarpallaarlutik imaluunniit piginnaanikitsutut, innersuussiffissaaleqisutut, neqeroorutissaaleqinermik imaluunniit malitseqartitsiviusumik nakkutilliinermik imaluunniit isumaginninnermi suliassanik piviusorsiorumik neqerooruteqarnissamut misigisimagunik, ilisimalikkat tamakku toqqorneqaratillu nipangiutiinnarneqassanngillat, saqqummiunneqartariaqarlutilli aqutissallu pigineqartut atorlugit ingerlateqqinneqarlutik, taamaaliornikkut ilisimalikkat pineqartulluunniit saqqummiunneqarsinnaaniassammata. Ajornartorsiutit saqqummersinneqanngippata aaqiissutissanik aallartitsiniarneq ajornakusuusaaq. Meeqqat inuusuttullu pisinnaatitaaffiisa qulakkeerneqarnissaat eqqarsaatigalugu tamanut pitsaanerpaassaaq nunatsinni meeqqat inuusuttullu tamarmik sumiginnaaffiunngitsuni ilaqutariinnilu toqqisisimasuni peroriartornissaat naalackersuinikkut anguniarneqarnissaa qulakkeerneqartariaqarpoq.

Sulisut ilaat annertusisamik nalunaaruteqartussaataapput, nunatsinnili innuttaasut allat aamma meeqqanik inuusuttunillu sumiginnaasernerup nungutinneqanissaa siunertaralugu suleqataanissaat pingaaruteqartorujussuullunilu aalajangiisuusorujussuuvoq. Ilaqutariinni ajornartorsiutit pillugit ammasumik isummertarnerup allanngortinneqarnissaa, nassuerutiginnissaa oqaloqatigiinnerlu assortorneqarsinnaanngitsumik imaluunniit meeqqanik inuusuttunillu sumiginnaasoqarneranik ilisimasanik pasitsaassaartoqartillugu qisuariarnissamut isummertarnerup allanngortinneqarnissaanik pisariaqartitsineq iluaqutaasussaavoq annertoq. Angajoqqaatut akisussaaffimmik kivitsinissamut isummertarnerullu allanngortinnissaanut akuersaarnissaq ilaqutariinnut sanngiitsunut ingerlanerliortunullu siunnerfilimmik suliniuteqartuarnissaq pisariaqarpoq, taamaattumik suliniutit taakku aalajangiuisimaneqarnissaat pisariaqartitsinerlu naapertorlugu sakkortusineqartarnissaat suli pingaaruteqarpoq.

Inuiaqatigiini innuttaalluartoq sumiginnagaasimasumik ilisimasaqaruni qisuariatussaavoq kisimilu pigiinnarnagu. Nunaqarfinniikkaluaraanni illoqarfinnikkaluaraanniluunniit meeqqanik inuusuttunillu sumiginneqarsimasumik atugarliortunillu innuttaminit akuerineqanngitsumik, aqutsinikkut naalackersuinikkullu ingerlatsinermi iliuuseqartoqartussaavoq innuttaasullu isitik matunagit akuersaanningsut inuiaqatigiulluartut nalilerneqarsinnaasariarput.

Ataatsimiititaliamit aamma kaammattuutigineqassaaq ilaqutariit ataasiakkaat illoqarfinniluunniit ataasiakkaani ajornartorsiutit piaartumik suussuserniartaqqullugit, illoqarfignisamilu tapersersortissarsioraqullugit siunersortissarsioraqullugillu, taamaalilluni illoqarfignisani ajornartorsiutinik nassueruteqarsinnaaneq aallaavigalugu aaqiissutissarsioraqarsinnaaniassamat. Ajornartorsiutit tamakku allanit avataaneersunilluunniit illoqarfinni isit matullugit isiginngitsuusaakkaningarnit sammineqarnerat pitsaanerussamat. Sumiginnaasarneq nalinginnaasunngortinneqangissaannassaaq nalinginnaasumillu akuerineqanngisaannassaluni imaluunniit pissuseriinnarneqalinngisaannassaaq imaluunniit inuuniarnikkut

ileqquliunneqanngisaannassalluni. Inersimasut aningaasanoortarnerannik, hashitortarnerannik imaluunniit imigassartortarnerannik meeqqanik inuusuttunillu sumiginnaasarneq aallaaveqarsimappat oqaluuserineqartariaqarpoq saqqummiunneqarlunilu, taamaalilluni kommunit siunnerfilimmik toqqaannartumillu suliniuteqarnissamut neqerooruteqarsinnaassagaluarput pinaveersaartitsinermillu suliniuteqarsinnaassagaluarlutik. Kommuni nukissanik neqeruutinillu pisariaqartinneqartunik soqanngippat, taava Naalackersuisunit siunnersorneqarnissamik, ilitsersorneqarnissamik tapersersorneqarnissamillu qinnuteqarsinnaavoq. Aaqqiissuteqarniarnissaq uninngaanartoqannginnissaalu aammalu ajornarorsiuteqartoqarneranik nassuerutiginninnissaq pingaarnerpaapput.

2016 Naalackersuisut siulittaasuata "meeqqat ukuat"-tut suaarutigaa. Taama suaaruteqarneq pisariaqartinneqartoq pisariaqarlunilu sumiginnaasarnerup suliniarfigineqarneranut meeqqallu pisinnaatitaaffii eqqarsaatigalugit aammalu ajornartorsiummut matumunnga toqqaannartumik aaqqiissutissarsiornermi sumiginnaasarnermilu pissutaasut tunuliaqutaat annertuut akuerineqarsinnaanngitsullu ataatsimiititaliaq isumaqarpoq.

Nassuernissamut piffissangorpoq sumiginnaasarnernullu tamanut iliuuseqarnissamut piffissanngorluni.

Naalackersuisut siulittaasuata nalunaaruteqarnera meeqqanut inuusuttunullu ilaqutaannullu tunngasuni nukiit pisariaqartinneqartut suussusersiniarneqarneri pillugit kommuninut isaassinerusoq, taamaalilluni inuuniarnermikkut ilungersunartumik inissisimasunut ilaqutariinnullu sanngiitsunut isumassuineq uteqqissinnaaniassammat.

Siunnersuutip tunuliaqutaa tujorminarpoq alianarlunilu, siunnersuulli nammineq illuatungeriit akuutinneqartut isummernissaannut periarfissaavoq pitsaasoq.

Siunnersuummut tunngatillugu kommunit eqqarsarnartoqartitsitsinerannut tunngatillugu pinaveersaartitsinissamillu aaqqiissutissatut pisariaqartitallu kommunit tikkuagaat Naalackersuisunit tusaaniarneqarnissaat tamatumunnga atatillugu ataatsimiititaliamit kaammattuutigineqassaaq, taamaaliornikkut kommunit suliassanik kivitsisinnaanerat qaffassarneqarsinnaaniassammat taamaalillunilu nunatsinni meeqqat inuusuttullu toqqiissisimasumik peroriartornissaannik naalackersuinikkut anguniakkanut takorluukkanullu naapertuutsisisoqarsinnaaniassammat. Tamatumunnga atatillugu Namminersorlutik Oqartussat kommunillu suleqatigiinnerisa pitsanngorsarneqarnissaa aalajangiissuusaaq.

Allannguutissatut siunnersuummi aalajangersakanut ataasiakaanut oqaaseqaatit pisariaqartumik ersarissuseqarsorinarput. Innuttaasut pisinnaatitaaffiisa qulakkeerneqarnissaat siunertaralugu malittarisassat sakkutut Naalackersuisunit atorneqarnissaat

kissaatigineqarnersoq naalakkersuinikkut toqqagassaasoq siusinnerusukkt
erseqqissaatigineqarpoq.

Siunnersuutip aningaasatigut kingunerisassai

Siunnersuutip piviusunngortinneqarnerani aningaasatigut kingunerisai siunnersuummut nalinginnaasumik oqaaseqaammi allaaserineqarput. Matuma ataani allassimavoq –

Siunnersuutip kingunerisaanik isumaginninnerup iluani marloqiusatut taaneqarsinnaasumik ingerlatsisoqalertarsinnaassaaq. Naak kommunip isumaginninnikkut ingerlatsinermit atorunnaarsitsinissaq aalajangiunneqaraluartoq, taava kommunip isumaginninnikkut ingerlatsinini aamma isumagiinnartussaassavaa, tamannali Naalakkersuisut immikkut ingerlatsinerat ilutigalugu pisussaassalluni.

Aningaasartuutit isumaginninnermut maleruagassat ataatsimoortut ingerlatsivimmi aqunneqarnissaanut kommunip akisussaaffigisaanut tunngasut kommunip allannguuteqanngitsumik akilertassava. Isumaginninnermut maleruagassani ataatsimoortuni ataasiakkaanut tunngatillugu utertitsilluni akiliisarnermut aqqissuussineq taamaaqataanik atuutissaaq. Naalakkersuisut kommunit sinnerlugit aningaasartuuteqartussaassanngillat imaluunniit aningaasartuutini akiliigallartussaassanatik.

Kommunip arsaarinninnermut aalajangiineq toqqammavigalugu Naalakkersuisut immikkut aningaasartuutaannik matussusiisartussaassaaq.

Naalakkersuisut suliassanik atorunnaarsitsinissaq pillugu aalajangiinnermi pineqartunut ilaasunik isumaginninnerannut aningaasartuutit AI 2016-imi, konto pingaarneq 30.01.01 Ilaqutariinnermut, Naligiissitaanermut Isumaginninnermullu Naalakkersuisoqarfik, aqutigalugu akilerneqassapput. Aningaasaliissutit isumaginnittoqarfiup aqunneqarnera aqqissuussaanelu pillugit Inatsisartut peqqussutaat naapertorlugu aningaasartuutinin tunngassuteqarput. Naalakkersuisut aningaasartuutaat tamatuma kingorna kommunimit pineqartumit akilersinneqassapput. Akileeqqusineq assersuutigalugu Namminersorlutik Oqartussanit tunniunneqartussani ilanngaatiginninnikkut pisinnaavoq. Tamanna tunngavigalugu naliliisoqarpoq atorunnaarsitsinissaq pillugu aalajangiisoqassappat, tamanna kontomi pingaarnermi 30.01.01 Ilaqutariinnermut, Naligiissitaanermut Isumaginninnermullu Naalakkersuisoqarfik, annertunerusunik aningaasaliissuteqarnissamik pisariaqartitsineq pilissanngitsoq.

Siumut oqaatigiuminaappoq kommunip oqartussaaffianik arsaarinnikkallarnerup kingunerisaannik qanoq immikkut aningaasartuuteqarfiusinnaassanersoq. Tamannami pisut toqqammavigalugit immikkut pissuseqartuusassaaq aammalu kommunip qanoq annertutigisumik sumiginnaasimaneranik qanorlu tulleriiaarinnilluni qaqlersuisoqarlunilu isumaginnittoqarnissaa apeqqutaasarumaarluni.

Pisortanut aningaasaqarnikkut allaffissornikkullu kingunerisassat allassimasut tamakkiisumik tusaatissatut ataatsimiititaliamit tiguneqarput.

Isumaginninnermi maleruagassat iluini suliassanik eqqortumik sullissisoqartarnissaanik, aalajangiisoqartarnissaanik pingaarnersiuisoqartarnissaanillu siunnersuut qulakkeerinneqataasinnaasoq allassimasoqarmat aammattaaq ataatsimiititaliamit maluginiarneqarpoq.

Isumaginninnikkut maleruagassat aqunneqarnerannut tunngatillugu inatsisini atuuttuni tunngaviit aallaavigalugit innuttaasut tamarmik eqqortumik sullinneqarnissaasa qulakkeerneqarnissaa nunatsinnilu innuttaasut atukkatigut qaffatsinneqarnissaasa qulakkeerneqarnissaat sutigut tamatigut pingaaruteqarluinnarmat ataatsimiititaliamit pingaartinneqarpoq.

Ataatsimiititaliap inassuteqaataa

Ataatsimiititaliami amerlanerussuteqartut Demokraatit Siumullu siunnersuut pillugu ima oqaaseqarumapput:

Siunnersuut manna unneqqarissutut kisiannilu pisariaqartutut Demokraatinit Siumumiillu isumaqarfigineqarpoq. Eqqarsaatigilluaqqaarlugu amerlanerussuteqartut siunnersuut ilusimisut iluseqartoq tapersorsorpaat.

Suliassaqarfik isumaginninnikkut malittarisassat kommunit ataanni inissisimasut tunngaviusumik ajalusoortillugit pisortat akuleruttarnissaannut inatsisissaq manna tunngavissiisaaq.

Ungasinngitsukkut kommuninut nakkutilliarternermi paasiniaanikkut amigaateqartoqarnera, isumaginninnikkullu suliassanik kinguortooteqartoqarnera pissutigalugu Naalakkersuisut nunatsinni oqartussat qullerpaartaat akulerunnissaat tigusinissaallu pisariaqartoq isumaqaratta. Isumaginninnikkut malittarisassanik atorunnaarallartitsineq piffissami killilimmik suliassaqarfinilu killilimmik ingerlanneqarsinnaasoq ersarissumik erseqqissumillu inatsisissami allassimavoq.

Sulisussaaleqinermik, sulisussarsiornermi ajornartorsiutit pisortat iliuuseqaqqullugit innersuussinerit naammassiniarneqarnerini ilaatigut kommunit sorsuuteqartarnerini tunngaviusumik ajornartorsiutigineqartarneri siunnersuummi aaqinneqarsinnaannginneri amerlanerussuteqartut isumaqatigaat.

Siunnersuut manna ikiorsiiniarnertut isigineqassasoq akisussaaffimmillu killilimmillu eqqarsartarnermut atorunnaarsitsissasaaq, innuttaasunut sanngiinnerusunut suliassanut sularineqanngitsunut iluaqutaasussaasoq ilanngullugu Siumut Demokraatillu isumaqarput. Innuttaasut ilungersunartumik inissisimasut ikiorserneqarnissaannut matumani pingaartumik

meeqqanut inuusuttunullu, pisariaqartutut isumaqarfigisatsinni, Naalakkersuisut kommunillu immikkut ikiorsiinissaannut periarfissiisoq aammattaaq isumaqarpugut.

Kommunini pissutsit ersarisa immikkut ittumik iliuuseqartoqartariaqalernera pisariaqartilerpaa. Meeqqanut inuusuttunullu sumiginnaanerit nalunaarutigineqartartut ilungersunartorujussuit aammalu meeqqanut inuusuttunullu pissutsit ernumanartorujussuit suliarineqarneq ajorsimaneri 2014-imi Qaasuitsup Kommunianut aamma Qeqqata Kommunianut nakkutilliiartornermi takutinneqarpoq. 2015-imi upernaakkut Ilaqutariinnermut Peqqissutsimullu Ataatsimiititaliamut ilisimatitsissutigineqarpoq Uummannami nunaqarfiinilu meeqqanut inuusuttunullu suliat nalunaarsorneqarsimasut 250-inut missingersorneqarsimapput, taakkunangalu minnerpaamik 150-t suliassaasut ernumanartut. Taamatuttaaq nakkutilliiernerup takutippaa Qaanaami, Maniitsumi Upernavimmilu meeqqanut inuusuttunullu tunngasuni suliassanik suliarineqanngitsorsimasorpasuaqartoq. Tasiilami meeqqat affaat illoqarfimmi najugallit annerusumik minnerusumilluunniit ilungersunartumik isumaginninnikkut suliassaqarfiusut 2016-imi aprilimi Kommuneqarfik Sermersuup ilisimatitsissutigaa, isumaginninnikkut suliassaqarfimmi annertoorujussuarmik unammilligassaqarnera pissutigalugu suliassat suliarineqarsinnaaniassammata ilaatigut Naalakkersuisunik suleqatissarsiortoqartoq Kommuni Kujalliup 2016-imi maajimi ilisimatitsissutigaa. Kommuni meeqqanut inuusuttunullu suliassaqarfinni nukissanik pisariaqartitsinerup qulaarneqarnissaanut Naalakkersuisut nassuiaatissaat soqutigalugu amerlanerussuteqartut utaqqimaarpaat. Meeqqanut inuusuttunullu suliassaqarfinni kommuninik suleqateqarnerup annertusarneqarnissaa amerlanerussuteqartut kajumissaarutigaa. Meerartatta inuusuttortattalu pisinnaatitaaffiisa qulakkeerneqarnissaat naalakkersuinikkut tunngaviusumik suliassaarput. Nammitsinnik inatsisigut Meeqqallu pillugit Isumaqatigiissut aallaavigalugit pisussaaffeqarpugut taamaattumik suliniutit pisariaqartut aallaavigalugit pisussaaffeqarpugut. Piffinni ajornartorsiuutit aaqinneqarsinnaanngippata, piffini namminneq aaqiiniartarnissaat pitsaanerpaagaluortoq, taamaattoq qitiusumiit aaqinneqartariaqartarnissaat imaluunniit avataaneersunit ikiortissarsiortoqartariaqarpoq. Meeqqanik inuusuttunullu sumiginnaasarnerit sulluunniit aamalu sukkulluunniit pisortani oqartussaasut akisussaaffimmik aamma sumiginnaasarnerat Inatsisartuni partiinit tamanit aamma Inatsiartut Ilaqutariinnermut Peqqissutsimullu Ataatsimiititaliaata akuerinngilluinnarmassuk ataatsimiititaliami amerlanerussuteqartut erseqqissaatigissavaat.

Iliuuseqarnissaq pingaaruteqartorujussuusoq ataatsimiititaliaq isumaqarpoq, siunersuummilu matumani Naalakkersuisut taamaaliortut isumaqarluta.

Tamanna tunngavigalugu amerlanerussuteqartut siuliani taaneqartut siunnersuut ilusimisut iluseqartoq Inatsisartunit akuersissutigineqassasoq inassutigaaat.

Ataatsimiititaliami ikinnerussuteqartut Inuit Ataqtigii siunnersuut pillugu ima oqaaseqarumapput:

Pineqartut tassalu kommunit tamarmullutik siunnersuut akuersaanngilaat, taamatutaaq kommunit Kattuffuata KANUKOKA-p sunnersuut akuerinngilluinnarpaa.

Tassa imaappoq, suleqatissat tamarmik siunnersuut akuersaanngilaat.

Inuit Ataqtigiit assorsuaq ajuusaarutigaarput, suleqatigiittussaagaluit imminnut taamak ungasitsigimmata.

Komuniniit KANUKOKA-miillu ersarissarneqarpoq Nam.Oqartussat inatsisinut ilitsersuutaat paasiuminaatsorujussuusut. Ukiorpaalunnilu kissaatigineqartuarsimagaluartoq, paasinarnersinnissaat. Na. Oqatussat nakkutilliisarnerat ukiunut sisamakkaartuusooq, akulikillitinneqarsinnaagaluartoq, taamaalilluni suliat tuaviortut uninnganninnissaat anguneqarsinnaagaluar mata.

Assortuussutaanngilaq ullumikkut kommunit sumiginnaanerat annertummat, Inuit Ataqtigiinniit erseqqissarlarput kommunit, Nam.oqatussalluuniit sumiginnasarnerat akuerineqanngimmat. Sulineq pitsanngorsartariaqarpoq, meeqqat pineqarmata, meeqqallu sumiginnarneqassanngimmata.


Massakkut periuseriniagaq imatut paasineqarsinnaavoq, equngasumik ingerlatsisoqarmat, Inatsisitigut equngasumut tulluarsartoqarnialersooq. Assersuutigalugu illup natia innarlarsimammat, taava illup pisatai natermiittut, equngasunngortinniarpagut, tulluarsarlugit. Innarlerneqarsimasoruna aaqinneqartariaqartoq, innarlarsimasumut tulluarsanata.

Taammaattumik Inuit Ataqtigiinniit Naalakkersusiut kaammatorusuppagut, kommunit qanimut suleqatigalugit, innarlarsimasooq aaqinneqaqqullugu.


Politikkikkut suliasanut akisussaaffinillu agguataarinerput allanngortiniissaanut Naalakkersuisuniit siunnertarineqarsimanerpa, Inuit Ataqtigiinnili Kommunit suleqatigilluarnissaat qinerparput siunnersuut akuersaangilarput.

Tamanna tunngavigalugu **ikinnerussuteqartut siuliani taaneqartut** siunnersuut itigartinneqassasoq inassutigaa.


Taama oqaaseqarluni isumaliutissiissummilu allasimasutut paasinnilluni ataatsimiititaliap siunnersuut aappasaaniigassanngortippaa.




Tillie Martinussen,
Siulittaasoq



Agathe Fontain




Jess Svane



Laura Tàunâjik



Ineqi Kielsen



Ane Hansen



Mimi Karlsen



Ilanngussaq
Bilag

1

Inatsisartut

Ilaqutariinnermut Peqqissutsimullu Ataatsimiititaliaq

Att.: Tillie Martinussen, Ataatsimiititaliap siulittaasua

20-05-2016
Suliap nr. 2016-687
Dokument nr. 2809644
Inatsisilerinnermut
immikkoortortaqarfik
Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

**Tallimanngornermi ulloq 20. maj 2016, nal. 16.00-16.45
ataatsimiittarfik 2-mi Ilaqutariinnermut Peqqissutsimullu
Ataatsimiititaliap siunersuinissaanut aggeqqusissut**

**Atorunnaarallartitsinermi tunngaviit sukumiinerusut atorunnaarallartitsinerullu
imarisaa.**

Kommuni pisussaaffimminik innuttaasulluunniit pisinnaatitaaffiinik annertuumik
sumiginnaasimappat kommunip isumaginninnikkut maleruaqqusanik ingerlatsinerat §
7a naapertorlugu Naalakkersuisut atorunnaarallartitsinissamik aalajangersinnaasut
ataatsimiititaliap maluginiarpaa.

***Aalajangersakkamut oqaaseqaatinik suliaqartoqarsimavoq, taamaakkaluartooq
atorunnaarallartitsinissaq qaqugukkut pisarnissaa atorunnaarallartitsinerullu qanoq
ingerlanneqarnissaanik eqqarsaatersortoqarnersoq itisileerlugillu
erseqqissaanissannik qinnuigineqarputit. Matumani piffissaq kommuninilu sulisunut
tunngasut eqqarsaatigalugit aammalu kommunimi/kommuninikommunip
pisussaaffiinut innuttaasullu pisinnaatitaaffiinut aporaattoqannginnissaa
siunertaralugu nukiit atorneqartussatut eqqarsaatigineqartut eqqarsaatigalugit.
Atorunnaarallartitsinerup ingerlanissaanut eqqarsaatit matuma ataani
allaaserineqarnissaa ataatsimiititaliap kissaatigaa.***

Akissut

Isumaginnittoqarfimmi najugarisami ingerlatsiveqarfimmi annertuumik
sumiginnaasoqartillugu atorunnaarallartitsineq immikkut pisoqartillugu
aalajangersakkatut eqqarsaatigineqarpoq, qitiusumik aqutsisoqarfimmiit

akuliuttoqarnissaa pisariaqalersimappat, innuttaasut inatsisitigut isumannaatsuunissaat imaluunniit aaqqissuussaanerup – tassa system-ip inatsisitigut akuerisaasumik ingerlanissaa eqqarsaatigalugu.

Assersuutitut uku eqqarsaatigineqarsinnaapput:

- Borgmesteri imaluunniit kommunaldirektøri naalackersuisoqarfimmut saaffiginnippoq ilisimatitsissutigalugulu kommunip isumaginninnikkut ingerlatsiveqarfia annertuumik ajornartorsiuteqartoq aammalu kommunip isumaginninnikkut suliassani piffissami saaffiginnissummi pineqartumi kivissinnaassangikkaa.
- Nakkutilliisutut immikkoortortaq imaluunniit siunnersuisartutut immikkoortortaq inatsisitigut annertuumik unioqquitsisoqartoq paasisaqarpoq, assersuutigalugu najugarisami isumaginnittoqarfiup aqutsisuanit annertuumik ukiunilu arlaqartuni ingerlatsinikkut sumiginnaasoqartoqarsimanera aaqqiivigineqarsimanngitsoq paasineqarluni, aammalu immaqa najugarisami sullarluttoqarnera imaluunniit isumaginninnikkut inatsisinik amigaateqartumik aqutsisoqarsimanera isumaginninnikkut aqutsisoqarfimmi nalinginnaasumik akuersaaginnarneqalersimalluni.

Atorunnaarallartitsinerup qanorpiaq iluseqarluni ingerlanneqartarnissaa takussutissioruminaappoq. Atorunnaarallartitsineri malittarisassaq immikkuullarissunik pisoqarnerani taamaallaat atorineqartassaaq, tassa pisuni assigineqanngitsuni aamma pisuni suliassanut ataasiakkaaqqissaartuni. Taamaalilluni atorunnaarallartitsinerup nalinginnaasumik qanoq ingerlanneqartarnissaanik takussutissiaateqartoqanngilaq.

Atorunnaarallartitsisoqarnissaa sioqqullugu suleriaaserineqartussa q ilimagineqartoq ima iluseqarsinnaavoq:

Atorunnaarallartitsineq sioqqullugu

- 1) Isumaginninnikkut inatsisini annertuumik unioqquitsisoqartoq Naalackersuisoqarfik paasisaqarpoq
- 2) Kommuni siunnersorneqassasoq aamma/imaluunniit nakkutigineqassasoq Naalackersuisoqarfik naliliisimavoq
- 3) Kommunit Nakkutilliisoqarfiat ilisimatineqassanersoq Naalackersuisoqarfik naliliisimavoq
- 4) Pisuni immikkuullarissuni atorunnaarallartitsinissaq pisariaqalersinnaanersoq Naalackersuisoqarfik naliliisimavoq, kingornalu
- 5) ajornartorsiut (atorunnaarallartitsinissarlu) pillugu Naalackersuisoqarfiup Naalackersuisumut akisussaasumut saaffiginnissutigineqarpoq, imaappallu

- 6) Naalakkersuisup pissutsit ima najummatsernartigisutut isigippagit atorunnaarallartitsinissaq pisariaqartinneqartutut isigineqarluni, taava kommunalbestyrelsiminngaaniit oqaaseqaammik piniartoqassaaq
- 6a) Kommunimiit oqaaseqaatini tiguneqartuni paasissutissat pissusiviusunut kukkussuteqarsimasut paasinarsitippasuk atorunnaarallartitsinissamut aalajangiineq nalilersoqqinneqassaaq. Taamaattoqanngippat Naalakkersuisoqarfik ima iliuuseqassaaq:
- 7) Atorunnaarallartitsinissamut akuersissuteqartoqarnissaa kissaatigalugu Naalakkersuisoqarfik Naalakkersuisut isummernissaannut tunngavissiussaaq

Atorunnaarallartitsineq

Naalakkersuisut isummernissaannut tunngavissiaq Naalakkersuisut akuersaarpasuk ima iliortoqassaaq:

- 8) Atorunnaarallartitsineq aallartinneqassaaq, Kommunillu Nakkutilliisoqarfiat ilutigisaanik ilisimatinneqassaaq, aamma
- 9) Suliaq pillugu kommunalbestyrelsimik oqaloqatigiinnerit aallartissapput, Naalakkersuisoqarfiullu immikkoortortaasa aammalu ingerlatsiviit iluini nukiiit pioreersut atorlugit atorunnaarallartitsineq aallartinneqassaaq piareersarneqarlunilu.

Kommunini allaffissornikkut pisariaqartitsinerup Naalakkersuisut kivitsinissaat eqqarsaatigalugu Naalakkersuisut nukinnik suminngaanniit pissarsissappat matumani pingaartumik atorunnaarallartitsinerup ingerlanerani?

Sulisoqarnikkut innersuussinissamillu periarfissat eqqarsaatigalugit.

Tamatumunnga tatillugu erseqqissaatigineqassaaq siunnersuut namminermi isumaginninnikkut suliassaqarfimmi nukissanik annertunerusumik pissarsiviusinnaanera isumaqarfigineqanngimmat, kommuniniuppat Naalakkersuisuniikkaluarpalluunniit.

Akissut

Kommunimi ingerlatsivimmi innuttaasut isumaginninnikkut pisinnaatitaaffiik annertuumik sumiginnaasoqartillugu ilaannakortumik tamakkiisumilluunniit kommunip ingerlatsiviani isumaginninnikkut malittarisassanik atorunnaarallartitsineq pisariaqartutut aamma akisussaassuseqartumik pissutsini immikkuullareqqissaartuni taamaallaat sakkussaasoq naqissuserneqartariaqarpoq, kikkunnulluunniit atorneqarnissaanik kissaatiginartinneqanngitsoq.

Apeqqut politikikkut allaffissornikkullu Naalakkersuisoqarfimmi oqaluuserineqarsimavoq, oqaluuserineqarneranilu minnerunngitsumik

anigaasaqarnikkut nukissatigullu attuumassuteqartut qanoq annertutigisumik nammakkersorneqarsinnaanersut piviusorsioortumik ukkatarineqarsimallutik. Isumaqatigiissutigineqarpoq anigaasaqarnikkut kingunerisassat piffissami atorunnaarallartitsinermi najugarisami ingerlatsivimmi atorunnaarallartitsinerup timitalerneqannginneranili suliarineqarsimasussaagaluartut taamaalillunilu Naalakkersuisoqarfimmi qitiusumik isumaginninnikkut suliassat pisariaqartumik naammassineqartariaqarnerini anigaasartuutaasut kommuninut ataatsimoorussanik anigaasaliissutaasartuni pioreersuni ilaareertutut oqaatigisariaqarluni, taamaalillunilu aamma kommuninut anigaasaqarnikkut nammakkeeqqinnermik kinguneqartariaqaratik. Tamanna kommuninut aamma allaffissornikkut nammakkersuutaanaviangilaq, kisiannili atorunnaarallartitsineq Naalakkersuisoqarfimmut suliassanik nutaanik kivittariaqakkanik malitseqassaaq, tassami atorunnaarallartitsinerup nalaani naalakkersuisoqarfittut ingerlatsinermi imiikkoortortat ilaanni suliassat nalinginnaasuni sulisorisat peqartassanngimmata. Taamaattoq nalilerneqarpoq suliassat pitsaasumik agguarneqarnerisigut allanullu suliassiissutigineqarnerisigut atorunnaarallartitsinerup nalaani ingerlatsinermi suliassat nukinginnartuunngitsut pingaarnersiuiinermi tunulliukkallarnerisigut sunniutissat killilersimaartinneqarsinnaasut. Assersuutitut taaneqarsinnaapput innuttaasunut paasititsiniaanerit imaluunniit immikkut sammisaqartunik isumasiuinerit imaluunniit pikkorissaanerit allaanerusumik piareersarneqartassasut, sapaatit akunnerini imaluunniit qaammatini arlalialunni kinguartinneqarlutik, ajornerpaamillu pisoqartillugu sivikinnerusumik unitsinneqarallartassasut, taamaattoorli soorunami nanginneqartarumaarlutik.

Kommunit isumaginninnikkut malittarisassanik isumaginninnerinut nakkutilliinerup nukittorsarneqarnissaa qanoq pisariaqartiginersoq isumaqarpit aammalu kommunit pisussaaffiisa innuttaasullu pisinnaatitaaffiisa eqqortinneqarnissaata qulakkeerinissaa siunertaralugu isumaginninnikkut suliassaqarfimmut tunngatillugu Naalakkersuisut kommunillu suleqatigiinnerisa nukittorsarneqarnissaanut periusissiamik anguniakkanillu qanoq annertutigisumik suliaqarpit??

Akissut

Nakkutilliinermik ingerlatsivimmik nutaamik pilersitsisoqarneratigut piffissaq tamakkerlugu sulisoqartunik ulluinnarnilu pisortaqtumik tamakkiisumillu nakkutiginninnissamik taamaallaat suliaqartussamik isumaginnittoqarfimmi ingerlatsinermi nakkutilliineq aamma ulloq unnuarlu angerlarsimaffinni nakkutilliineq malunnaateqarluartumik nukittorsarneqareerpoq. Taamattaq qitiusumik siunnersuisarfimmik pilersitsisoqareerpoq, kommunini meeqqat isumagineqarneranni sullissinermi pikkorissutsikkut ilapittuutaasussamik, taamaalillunilu kommunini sullissinerup pitsaassusaanik ingerlaavartumik

qaffassaasoqarneranik kinguneqartussamik. Taamaattoq nakkutilliisoqarnerup tungaatigut suli annertunerusumik nukittorsaasoqarsinnaavoq. Tassami isumaginnittoqarnikkut nalunaarutiginnittoqartillugu aamma paasissutissanik allanik attuumassuteqartunik pingaaruteqartunik piffissaagallartillugu Naalakkersuisoqarfiup pissarsisinaanera ullumikkut unammillernartut suli naammassineqanngitsut ilagivaat. Tamatumani assersuutaasinnaapput meeqqat angerlarsimaffiup avataanut inissinneqartartut pillugit paasissutissat aamma sullitassat allanut tungatillugu paasissutissat - eqqoqqissaartut tutsuiginartullu. Taamaattumik meeqqanut ikiorsiisarnissaq pillugu 2016-imi ukiaanerani inatsisissatut siunnersuummik saqqummiussaqaassaanga, ilaatigut nakkutilliinerup aamma siunnersuisartutut immikkoortortap kommuniniit paasissutissanik pisinaanerinik nukittorsarneqarnissaanik imaqartumik aammalu nuna tamakkerlugu nalunaarutiginneriaatsimik nutaamik pilersitsinissaq eqqarsaatigalugu, tamatuma kingorna nalunaaruteqartoqartillugu kommunit nalunaarutininik tigusaminnik qitiusumut nalunaarutiginnittalersissallugit meeqqanik sumiginnaasoqartillugu Naalakkersuisoqarfiup nakkutilliivianit nalunaarutiginninnerit tamakku tamakkiisumik nalunaarsorneqarsinnaaqqullugit aammalu kommuninut nakkutilliartorluni angalasarnerni nakkutilliivimmit malitseqartitsinermi atornerqarsinnaasunngortillugit.

Inussiarnersumik inuulluaqqusillunga



Martha Lund Olsen